

AKASHVANI AIZAWL

REGIONAL NEWS BULLETIN

HEADLINES (EVENING)

1. Information & Public Relations Minister Pu B. Lalchhanzova'n All India Radio Aizawl chu Mizo hnam zia leh tawng vawn him kawngah tangkai takin hna a thawk thin a ti.
2. CADC-a BJP chuan ZPM kaihhruai Mizoram State sawrkar chu Autonomous District Council-te ngaihthah leh thliar hrangah puhin, sum harsatna an tawh te Governor hnenah ziakin an thlen.
3. Zan hnih riaka New Delhi-a zin Chief Minister Pu Lalduhoma chuan vawiin khan dam takin Aizawl a lo thleng.
4. Assembly inthlan result puan anih hnuah inthlan neihna State leh Union Territory-ah sorkar thar siam turin political party-te an inbuatsaih chho mek..

<><><>

AIR 90 YEARS MUSICAL CONCERT

Information & Public Relations Minister Pu B. Lalchhanzova'n All India Radio Aizawl chu Mizo hnam zia leh tawng vawn him kawngah tangkai takin hna a thawk thin a ti a, Mizo hnam nun vawng himtu pawimawh tak a ni a ti.

All India Radio Aizawl in kum 90 a tlin 90 tlin lawmna kal zelah vawiin khan Musical Concert a buatsaih a, he hun hi hmanpuuin Pu B. Lalchhanzova chuan tunlai khawvelah hnam ral tam tak an awm tawh avangin hnam ziarang leh tihdan hrang hrang vawnhim kawngah theihtawp chhuah a tul a ti a, Mizo thu leh hla vawnhim kawngah All India Radio Aizawl chu a tangkai takzet tih sawiin Mizo hnam nun vawng himtu pawimawh tak a ni tih a sawi.

Minister chuan hnam ziarang vawnhim bakah nun dan tha midang zirtir chu tunlaih a pawimawh hle a ti a, Pi leh pute chin dan vawiin thlenga chhawm nun ani chu lawmawm a tih thu a sawi a, mahni hnam ngaisang tura inzirtir a pawimawh a, All India Radio Aizawl chuan mitinin kawng dik an zawh theih nan nasa takin hna a thawk thin tih a sawi.

Byte of Minister

All India Radio Aizawl Director leh Mizoram Cluster Head Pu DR Lalropuia pawhin thusawiin All India Radio chu June ni 8, kum 1936 ah din ani a ti a, India chu ram zalen anih hma in mipuite awi tleitu ber alo ni tawh a, thuthar puanchhuahna ringawt nilovin India hmasawmna tura thawktu sawrkar leh mipuite thlunzawmtu tangkai tak ani a ti a, tun thlengin mipuite rin ber ani tih sawiin India in Viksit Bharat 2047 hmalaka hnuah ram hmasawn nih a tumna ah pawh Radio chuan mawhphurhna pawimawh tak a nei tih a sawi a ni.

Byte of Director

Vawiina hun hmanah hian All India Radio Top Grade Artist Pi Vanhlupui leh A' Grade Artist pali - Lalthanlangi Pachuau, Siampuii Sailo, C. Vansanga leh Rualthankhuma Chhakchhuak te chawimawina hun hman a ni a, zai leh lam nen hun hlimawm tak hman a ni.

All India Radio kum 90 tlin lawmna pual hian All India Radio Aizawl pawhin kum 60 a tling a, hemi pual hian Aizawl mai bakah Cluster hrang hrangah programme buatsaih a ni.

(CORR-Isaac)

<><><>

MZP

Mizo Zirlai Pawl MZP chuan kumin pawl 12 result chhuaka Arts, Science leh Commerce stream-a topper te chawimawina vawiin khan I&PR Auditorium-ah an buatsaih a; minister of state Prof. Lalnilawma'n hmanpuuin, zirlaite chu theihtawp chhuah zel tur leh awm mai mai lo turin a chah.

Prof. Lalnilawma chuan hlawhtlinna chu vanneihna vang ni loin, thawhrimna leh duhthlanna hman dikna atanga neih a nih thin thu a sawi a; zirlai titha chawimawite pawh tuna an thlen chinah chawl mai lo tura chahin, nakinah mi hnunga chak taka an tlan loh nan inthlahdah loin, hmalam thui tak thliar chungin theihtawp chhuah se, a ti.

Nih tum leh thil tih tumah chiang tura zirlaite chahin Prof. Lalnilawma chuan, vawiin an duhthlanna chuan nakina an hmalam hun tur a hrii avangin duhthlanna dik nei tur leh an zir tur ang an zir zawh hunah pawh hnain a rawn pan hun nghaka awm mai mai lo turin a chah bawk.

MZP-in HSSLC topper chawimawina an pekte chu Arts stream-a pakhatna Lalnunhlui, Science stream-a pakhatna Lalmoipuia Lawmzual leh Commerce stream-a pakhatna Vanlaltleipuia te an ni a; an pathum hian St. Pauls' Higher Secondary School zirlaite vek a ni.

Chawimawina inkhawmah hian zirlai nu leh pate, St. Pauls' HSS zirlaite leh zirtirtute an tel a; MZP General Headquarters Adviser Pu Lalhruiatuanga Chawngte-in fuihna thu a sawi bakah, MZP president Pu C Lalremruata pawhin thu a sawi bawk.

(Johnny CORR)

<><><>

BJP MIZORAM

Chakma Autonomous District Council (CADC)-a BJP chuan thuchhuah siamin Zoram People's Movement kaihhrui Mizoram State sawrkar chu Financial Year 2025–2026 atana sorkar hnathawk hlawh tang chu Financial Year 2026–2027 1st Quarter allocation nen ala pek chhuah loh avangin nasa takin a dem thu a sawi a. Hetianga dik lo taka tikhawtlai hian Mizoram chhunga Autonomous District Council-te State Sawrkar-in a ngaihthah leh thliar hranna a neih chhunzawm zel tih chiang takin a pholang a ti.

CADC hnathawkte thla nga chhung hlawh cheng nuai 6,377 sing 7 sang 9 pek loh a la ni a ti a. Kum hmasa lamah chuan hetiang deficit sum hi 1st Quarter nen hian sanction leh tihchhuah fo a ni a, hei hian Council-te chu mumal taka an kalpui theih nan a puil thin thu a sawi a, kumina hetiang thil thleng hian inthlak danglamna siamin sum lama harsatna nasa tak a siam a, CADC chhunga hnathawkte, rorelna, leh administrative function pawimawh tak takte chu nasa takin a nghawng a ni a ti bawk.

Hemi chungchangah hian vawiin khan CADC mipui aiawhin BJP district hruaitute chuan Chawngte a Sub-Divisional Officer (Civil) kaltlangin Governor hnenah lehkha an thehlut a, deficit sum chu tuna State Budget 2026–2027 atanga pe turin an duh thu an sawi.

BJP District President Pu Durjya Dhan Chakma chuan ZPM kaihhrui State sawrkar chuan Autonomous District Council pathumte hnenah a zawnin financial year hnih, 2024–2025 leh 2025–2026 chhung atan Revised Estimates (R.E.) hnuai cheng khat mah a pe chhuak lo tih a sawi a, a bik takin financial year khar lai hian a pe chhuak lo a ni a ti a, Chumi avang chuan Mizoram chhunga ADC zawng zawngte sum dinhmun chu a chhelo thei lo dinhmun ah a awm tir a ni a ti.

(PR)

<><><>

AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchintha puan leh a ni ang.

<><><>

CM

Zan hnih riaka New Delhi-a zin Chief Minister Pu Lalduhoma chuan vawiin khan dam takin Aizawl a lo thleng a.

Chief Minister hian Delhi a a cham chhungin Parliamentary Affairs leh Minister of Minority Affairs Minister Pu Kiren Rijiju a kawm a, PMJVK hnuai Mizoram sorkar project ngaihpawimawh 23 te a thehlut a. Union Minister hian a vaiin a lo pawm a ni.

NITI Aayog Member kal chhuak tur Dr. VK Paul pawh a kawm a. Mizoram tana thahnemngai taka hma a lak thin avanga lawmthu hrilhin, Ginger Capital of India a Mizoram an puan avanga Mizoram sawhthingin ram pum huap hriat a hlawh chhoh mek thu a hrill a Mizoram sorkar leh NITI Aayog tang dunin Tourism Conclave an buatsaih tur chungchang leh Mizoram tana thil pawimawh dange a sawipui a.

Inkawmnaah hian Tourism Minister Pu Lalnghinglova Hmar, pawh telin Niti Aayog leh Mizoram sorkarin Tourism Conclave an buatsaih dun tur chungchanga hmalakna an thliar a. May thla chawhnu lamah Delhi-ah pre-conclave meeting neih an rel a ni.

Niti Aayog lam hian Mizoram tourism policy changtlung zawk duan dan tur te, Mizoram puala Institute of Hotel Management-Ashok (IHM-A) hnuai a thlawna training neih theih dante leh investor koh luh chungchangte Chief Minister leh Tourism Minister hi an sawipui bawk.

Nizan khan Union Minister of Road Transport & Highways Pu Nitin Gadkari pawh kawmin Mizorama National Highways leh Lei (Bridges) pawimawhte tihmasawna tur chi hrang hrang a sawipui a. A thil thlen zawng zawng hi MoRTH hian a lo pawmsak deuh vek niin sorkar thuchhuah chuan a sawi.

(Desk)

<><><>

GOVT FORMATION

Assembly inthlan result puan anih hnuah inthlan neihna State leh Union Territory-ah te, sorkar thar siam turin political party-te an inbuatsaih chho tan a, Tamil Nadu-ah chuan film atanga politics-a lut, C. Joseph Vijay-a kaihhrui, Tamilaga Vettri Kazhagam (TVK) chuan seat 108 la-in party mala seat la hnem ber a ni a, TVK MLA thlan tharte chu Chennai bul, Paniyur-a an party hqrs-ah thukhawmin an hruaitu atan Joseph Vijay-a an thlang a, Pu Vijay-a hi Perambur leh Tiruchy East seat-ah a tling ve ve a ni.

Seat 234 awmna Tamil Nadu assembly inthlanpuiah hian rorellai DMK chuan seat 59 la-in eptu pawl lian ber, AIADMK-in seat 47 an la a ni. Hetih lai hian Chief Minister MK Stalin-a chuan Governor hnenah banna a thehlut a, a banna hi pawmsak a ni.

Puan tawh angin, Keralam-ah chuan Cong kaihhrui UDF sorkar din turin inbiakna neih mek a ni a, West Bengal-ah BJP sorkar thar din turin ruahmanna chak taka kalpui a ni a, sorkar thar hi Gurudev Rabindranath Tagore-a pianchampha, tun thla ni 9-ah lak luh anih rin a ni.

Assam-ah BJP-in sorkarna an chang zui dawn a, Puducherry-ah pawh BJP kaihhrui NDA sorkar din turin ruahmanna kalpui mek a ni.

(NSD)

<><><>